

SOALAN NO. 35**PEMBERITAHUAN PERTANYAAN DEWAN RAKYAT****PERTANYAAN : LISAN****DARIPADA : YANG BERHORMAT PUAN KASTHURIRAANI
A/P PATTO [BATU KAWAN]****TARIKH : 7 NOVEMBER 2017****SOALAN :**

YB Puan Kasthuriraani A/P Patto [Batu Kawan] minta PERDANA MENTERI menyatakan:

- (a) apakah kos prosiding jenayah daripada Jabatan Peguam Negara dari Mahkamah Rendah sehingga mahkamah Persekutuan; dan
- (b) bilangan banduan dalam semua penjara di Malaysia mengikut kaum dan jantina dan kos mengurus setiap banduan bagi tempoh setahun.

JAWAPAN: YB DATO' SRI AZALINA BINTI OTHMAN SAID,
MENTERI DI JABATAN PERDANA MENTERI.

Tuan Yang di-Pertua,

Untuk makluman Ahli Yang Berhormat, kos prosiding jenayah daripada Mahkamah Rendah sehingga Mahkamah Persekutuan yang melibatkan Jabatan Peguam Negara bergantung kepada jumlah pertuduhan jenayah yang dimulakan dan dijalankan di mahkamah. Kos prosiding mahkamah khususnya bagi prosiding jenayah adalah selaras dengan laporan kes jenayah yang disiasat dan dirujuk kepada Jabatan Peguam Negara yang berhubungan dengannya prosiding jenayah dimulakan dan dijalankan di mahkamah sehingga ke peringkat rayuan.

Perbelanjaan untuk prosiding jenayah tersebut dilakukan atas dasar kepentingan awam dan ditanggung oleh Kerajaan bagi memastikan keadilan diberikan kepada semua pihak yang terlibat.

Untuk makluman Ahli Yang Berhormat juga, statistik Jabatan Penjara Malaysia pada 9 Oktober 2017 menunjukkan terdapat seramai 54,517 orang banduan sedang menjalani hukuman atau ditahan di penjara seluruh negara (36 penjara). Daripada jumlah tersebut seramai 40,923 orang adalah banduan warganegara Malaysia, manakala 13,594 orang lagi adalah banduan warganegara asing. Berdasarkan jantina pula, seramai 50,676 adalah lelaki manakala 3,841 adalah wanita.

Kerajaan membelanjakan sebanyak RM35.00 sehari bagi membiayai seorang banduan di dalam penjara yang melibatkan kos utiliti iaitu penyediaan makanan, peralatan, pakaian, kesihatan, latihan, perhubungan, bekalan air, bekalan elektrik, emolumen kakitangan, program pemulihan dan lain-lain.

Sekian, terima kasih.